

大日本史

八

廢帝 第十八卷 本紀
 稱徳天皇 第十九卷 本紀
 光仁天皇 第二十卷 本紀

太政官文庫		
一	二七〇三	和
五〇	二〇三	書
冊	函	門

閣文庫		内閣文庫	
二六九	一七〇三	番號	和 11703
函	五〇三	冊數	150 (8)
四	冊	函號	269 21
架	號		



糊などで貼り付けられている部分がめくれない箇所あり

大日本史卷之十八

本紀第十八

權中納言從三位源光圀下修

男權中納言從三位綱條校

玄孫權中納言從三位治保重校

廢帝言

諱大炊天武帝孫崇道盡敬皇帝舍人

第七子也○一代要記母夫人當麻氏列諸

王天平寶字元年三月皇太子廢四月孝謙



帝召羣臣議皇嗣右大臣藤原豐成中務卿藤原永手等推鹽燒王攝津大夫文室珍努左大辨大伴古麻呂等推池田王大納言藤原仲麻呂言知臣莫若君知子莫若父唯天意所擇孝謙帝曰宗室之長唯舍人新田部二親王故立道祖王為皇太子而不順教誡遂縱淫行是以廢之今宜擇舍人親王子然船王惟薄不修池田王孝行有闕鹽燒王先帝嘗責其無禮唯大炊王雖未長壯過惡不

聞宜立為嗣於是遣內舍人藤原薩雄率中

衛二十人迎天皇於田村第立為皇太子

天平寶字二年戊戌秋八月庚子朔天皇受

禪即位於大極殿

○一代要記曰十八日即位誤又曰都于平城甘檉

宮本書無所見故不書

時年二十六

年據本書立為皇太子時二十五之

文及水鏡愚管鈔歷代皇紀

百官及僧綱詣朝堂上表上

尊號於孝謙帝曰上臺寶字稱德孝謙皇帝

尊皇太后曰中臺天平應真仁正皇太后孝

謙帝詔曰朕覽卿等所請鴻業良峻祇畏允

深顧以寡薄、何當休名、而上天降祐、帳字開
 平、厚地薦祥、蠶文表德、天意難違、俯從衆願、
 又見上皇太后尊號、感喜交懷、從公卿之所
 表、依耆緇之所請、受此惟新之號、何無洗舊
 之令、宜改百官之名、載施寬大之澤、其天下
 見禁囚徒、罪無輕重、咸從放免、紫微內相藤
 原仲麻呂如故、紫微內相以九日戊申、敕曰、
 子尊其考、禮家所稱、策書鴻名、古人所貴、昔
 者先帝敬發洪誓、造盧舍那金銅大像、既而

鎔銅已成、塗金不足、天感至心、地出勝
 寶之金、於是國家初有奇珍、開闢已來、未聞
 若斯、至若賊臣懷惡、謀危社稷、而畏威武、咸
 自馴服、可謂聖武之德、比古有餘、而不奉揚
 洪業、何以示後世、爰依舊典、追上尊號、策稱
 勝寶、感神聖武皇帝、謚稱天璽國押開豐櫻
 彥尊、欲使傳休名於萬代、揚茂實於千秋、普
 告遐邇、知朕意焉、追尊日並知皇子命、稱岡
 宮御宇天皇、十八日丁巳、以明年運當三合、

敕使文武百官、天下百姓老幼、念誦摩訶般
若波羅蜜、十九日戊午、遣從三位池田王、告
定齋王於大神宮、○本書不載其名、按一代
要記、是月以山於女王為
王、又遣使奉幣大神宮、及諸國神社、告即位、
二十五日甲子、敕紫微內相藤原仲麻呂、中
納言石川年足等、改易官制、改太政官為乾
政官、太政大臣曰太師、左大臣曰太傅、右大
臣曰太保、大納言曰御史大夫、紫微中臺為
坤宮、中衛大將曰太尉、是日、以仲麻呂為

太保、加賜姓惠美、改名押勝、九月十八日丁
亥、小野田守至自渤海、○本書不書田守、冬
使于渤海、蓋闕文、
十月二十五日甲子、敕曰、吏者民之本也、數
遷代則民不知所從、唯久其任、而後民服其
德、而從其化、安其業、而信其令、頃年國司交
替、皆以四年為限、適足勞民、未及布化、孔子
曰、如有用我、三年有成、夫以大聖之德、猶須
三年、而況中人乎、古者三載考績、三考黜陟、
所以表善簡惡、令臣庶各盡其力也、自今以

大日本史 卷十八 本紀 三

後宜以六歲為限省送故迎新之費其每至
 三年遣巡察使推檢政迹慰問民憂待滿兩
 迴隨狀黜陟庶令移易貪俗悉變清風黎元
 息肩倉廩有實十一月二十三日辛卯御乾
 政官院大嘗十二月十日戊申遣渤海使小
 野田守奏安祿山作亂於唐唐國大亂因敕
 太宰府曰安祿山者是狂胡狡豎也逆天犯
 上事必不利彼不能圖西還更掠海東古曰
 蜂蠆猶毒況於人乎府帥船王大貳吉備朝

臣真備俱是碩學名顯當世簡在朕心委以
 重任宜知此狀預為之備

三年己亥春正月三日庚午渤海來貢○本

高麗按此時高麗既滅渤海有其地本書舉
 其舊號迭書渤海高麗今一書渤海以見其

實下七日甲戌以雨停節宴三月丁卯朔日

有食之夏五月九日甲戌太上天皇敕曰○按

本書書上尊號於孝謙帝而不載其為太
 天皇寶字三年六月宣命有我皇聖太上天
 皇之文故今據朕以榮昧欽承聖烈母臨六
 之書太上天皇朕以榮昧欽承聖烈母臨六
 合子育兆民見一物之或違恨堯心之未洽

大日本史 卷十八 本紀 四

聞萬方之有罪、思湯責而多愧、而今大亂已平、逆臣遠竄、然猶天災屢見、水害頻臻、竊恐聽易隔於黎元、人含冤枉、鑿難周於宇宙、家懷鬱憂、庶欲博採嘉言、旁詢良策、憑衆智而益國、賴羣明以利人、宜令百官五位已上、緇徒師位已上、悉書意見、密封奉表、直言正對、勿有隱諱、朕與宰相、審簡可否、不須詐稱聖德、苟媚取容、面弗肯陳、退遺後毀、普告遐邇、知朕意焉、是日、敕諸國置常平倉、六月三日

丙申、以僧普照奏、敕植菓樹於路傍、令行旅

就陰啖實、


二日以下、水鏡、元亨釋書、係去年。

十六日庚戌、詔

追尊皇考曰崇道、盡敬皇帝、尊皇母當麻夫人曰太夫人、兄弟姊妹為親王、十八日壬子、以將伐新羅、敕太宰府、造行軍式、二十二日丙辰、敕治國之要、莫若簡人、簡人任能、民安國富、今內外官人、曾無廉恥、志在貪盜、豈是人之稟性、悉皆無良、蓋由宰相訓導之不力、宜加誘誨、各立令名、維城典訓、敘為政之規

模著修身之檢括律令格式錄當今之要務
 具庶官之紀綱並是窮安上治民之道盡濟
 世弼化之宜而父兄不識何以導子弟官吏
 不行何以教士民若有修仁義禮智信之善
 戒貪嗔癡淫盜之惡兼讀前二書者舉而察
 之隨品昇進自今以後除此色外不得任用
 史生已上庶令懲惡勸善重名輕物是日百
 官及師位僧等各上封事以陳得失二十三
 日丁巳敕諸國置放生池嚴禁捕漁二十三日以下

類聚國史秋八月六日己亥遣太宰帥船親王于
 香椎廟告伐新羅二十九日壬戌太宰府大
 風九月十九日壬午以征新羅敕諸國造戰
 艦五百艘冬十月京畿大風壞廬舍十一月
 二日甲子免遭風者今年田租九日辛未敕
 坂東八國曰陸奧若有急求援每國差發兵
 二千擇精幹國司一人押領相救是日頒國
 分二寺圖於天下十六日戊寅造保良宮十
 二月二日甲午置授刀衛



四年庚子春正月二日甲子車駕臨太保藤原惠美押勝第四日丙寅從太上天皇御內安殿以太保押勝為太師五日丁卯渤海來貢天皇從太上天皇幸押勝第二十一日癸未遣巡察使於七道文部少輔藤原楓麻呂東海道仁部少輔石川公成東山道河內少掾石上與繼北陸道尾張介淡海三船山陰道右少辨布勢人主山陽道典藥頭馬夷麻呂南海道武部少輔紀牛養西海道

○本書在丙寅

上今推甲子叙之 二月二十九日庚申設仁王會於

宮中及東大寺三月十六日丁丑敕鑄新錢金錢銀錢並行夏閏四月二十三日壬午轉讀大般若經於宮中五月十八日丁未誦經於京師六大寺十九日戊申敕如聞頃者疾疫流行黎元飢苦天下高年鰥寡孤獨廢疾及罹疫者當道巡察使宜與國司親問患苦賑給六月七日乙丑天平應真仁正皇太后崩癸卯○今推干支是月己未葬皇太后秋朔無癸卯疑有錯誤

大日本史 卷卅八 相續 七

七月戊子朔、日有食之、八月十八日乙亥、徙御小治田宮、九月十六日癸卯、新羅遣使朝貢、以其失禮却之、冬十一月六日壬辰、日南至、敕曰、先歲逆徒、家掛羅網、今年巡察、人畏憲章、古人有言、盜窺財主、有自來焉、撫躬自訟、責歸元首、靜言興念、憂心如灼、書不云乎、德惟善政、政在養民、今陽氣初萌、日南既至、地維育物、天道更生、宜承地施仁、順天降惠、俾茲黔庶、與時維新、其赦天下、十二月十二

日戊辰、敕大皇太后皇太后墓、並稱山陵、置國忌、是歲上野饑、伊勢志摩近江美濃若狹伯耆石見播磨備中備後安藝周防紀伊淡路讚岐伊豫疫、賑給之、五年辛丑、春正月丁亥朔、以新宮未成、廢朝七日癸巳、以太史局奏、遷御小治田岡本宮、十一日丁酉、還自小治田宮、御武部曹司、是月、敕築戒壇于下野藥師寺、筑紫觀世音寺、是月以下、元亨釋書、帝王編年記、三月二十四日己酉、流茅

大日本書紀 卷三十八 本紀

原王於多禰島、夏六月十七日庚午、賞大和
介日置真卯廉勤、賜稻一千束、秋七月癸未
朔、日有食之、二日甲申、以巡察使奏、令筑紫
七國造甲刀弓箭、以備不虞、十九日辛丑、遠
江荒玉河堤決、修築之、八月癸丑朔、敕曰、頃
見七道巡察使奏狀、曾無一國守領、政合公
平、貪濁人多、清白吏少、朕聞授非賢哲、萬事
咸邪、任得其才、庶務悉理、止如國司一色、親
管百姓、弊導風俗、字撫黎民、特須精簡、必稱

其職、其居家無孝、在國無忠、見利遺義、臨財
忘耻、上交違禮、下接多諂、施政不仁、為民苦
酷、差遣邊要、詐稱病重、任使熱官、競欲自拜、
匪聞教義、靡率典章、措意屬心、唯利是視、巧
弄憲法、漸汚皇化、如此之流、壞風亂俗、雖有
周公之才、固不足觀也、宜還却田園、令勤耕
作、若有悔過自新、必加褒賞、迷塗不返、貶黜
終身、普告遐邇、曉諭衆庶、十二日甲子、從太
上天皇、幸藥師寺、禮佛、還御、授刀督藤原御

楯第宴飲冬十月十三日甲子行幸保良宮
 十九日庚午車駕臨近江按察使藤原御楯
 第遂臨太師押勝第宴飲賜從官物有差二
 十二日癸酉以右虎賁衛督仲石伴為遣唐
 大使上總守石上宅嗣為副使武藏介高麗
 大山為遣渤海使二十八日己卯以修平城
 宮暫御保良宮詔免近江及左右京大和和
 泉山背今年田租曲赦近江十一月十七日
 丁酉以從四位下藤原惠美朝獵為東海道

節度使從三位百濟敬福南海道使正四位
 下吉備真備西海道使點船三百九十四艘
 兵四萬七百皆免三年田租習騎射陣法兼
 造兵器是歲五穀不稔多飢死者是歲以下據實字七
年六年壬寅春正月庚辰朔以宮室未成廢朝
 二日辛巳日有食之二十日丁未命太宰
 府造綿襖二萬二百五十具二月六日乙
 卯造綿甲一萬一千領充鎮國衛府夏四月八

日丁巳、修河內狹山池隄、五月九日丁亥、美濃飛驒信濃地震、賜遭災者穀、家二斛、二十三日辛丑、車駕還平城宮、御中宮院、太上天皇御法華寺、六月三日庚戌、太上天皇召五位以上於朝堂、宣詔親決國家大事、二十一日戊辰、修河內長瀨隄、秋八月十一日丁巳、令左右京尹藤原惠美訓儒麻呂、文部大輔中臣淨麻呂等侍中宮院、傳宣敕旨、冬十月丙午朔、伊吉益麻呂等至自渤海、○按本書大使高麗

大山舟中罹疾而卒、故副使益麻呂奉使而還、十一月三日丁丑、遣

御史大夫文室淨三等奉幣太神宮、廿六日庚寅、遣參議藤原巨勢麻呂等奉幣香椎廟、告為征新羅、調習軍旅、二十六日庚子、奉幣及弓矢於天下神祇、二十七日壬寅、遣使奉幣天下羣神、是歲、尾張參河遠江下總美濃能登備中備後讚岐早京畿及伊勢尾張遠江近江美濃若狹越前石見備前饑、陸奥疫、賑給之、

大日本紀 卷十八 本紀 十一

七年癸卯春正月三日丙午渤海來貢十五日戊午詔曰如聞去天平寶字五年五穀不登飢斃者衆其五年以前公私逋負宜咸原免十七日庚申渤海使奏唐國之亂未息敕太宰府曰唐國喪亂使命難通唐人沉惟岳等宜安置優給如懷土願歸者給船發遣二十一日甲子內射二月十日癸未新羅遣使貢調却之夏四月甲戌朔以京師米價騰貴糶左右京穀五月二十八日庚午以旱奉幣

帛于四畿內諸神秋八月辛未朔敕曰如聞

去歲霖雨

○按本書去年書旱不書霖雨蓋闕文也

今年亢旱五

穀不熟米價踊貴百姓飢饉疾疫死亡朕每念茲情深傷惻宜免京畿七道諸國今年田租十八日戊子以山陽南海等道諸國旱停兩道節度使是日廢儀鳳曆行大衍曆九月庚子朔敕曰疫死多數水旱不時神火屢起耗損官物此國郡司等事神不恭之咎也又一旬亢旱致焦枯之憂數日霖雨抱流亡之

嗟、此國郡司等、使民失時、不修隄堰之過也、
自今以後、有若是者、自目己上、宜悉遷替、不
使久居其職、勞擾百姓、更簡良材、可速登用、
使拙者歸田、賢者在官、各修其職、無為民憂、
四日癸卯、以僧道鏡為少僧都、冬十月四日
癸酉、行幸山背、是歲大和河內攝津尾張近
江美濃信濃陸奥出羽越前能登丹波丹後
播磨備前備中備後淡路阿波讚岐伊豫饑、
攝津山背伊賀壹岐疫、賑給之、但馬伯耆出

雲石見年穀不登、遣使覆損、
八年甲辰、春三月十九日丙辰、以淡路連旱、
給種子、二十一日己未、敕曰、周急之言、義著
曩聖、救飢之惠、道茂先修、頃年水旱、民稍餒
乏、東西市頭、丐食者衆、念斯失所、情軫納隍、
而聞糺政臺少疏正八位上土師島村出所
蓄糧、資養窮斃者十餘人、其事雖小、義有可
褒、仍授位一階、自今已後、有如此者、所司檢
察、錄實告官、是春、攝津出雲石見播磨備前

皇朝通志 卷之十一 綱目

備中備後飢志摩疫賑給之夏四月十六日
癸未以旱遣使奉幣帛於畿内神社是夏美
作阿波讚岐伊豫飢淡路疫賑恤之秋七月
十七日壬子罷東海道節度使八月三日戊
辰節部省倉災十四日己卯遣使大和河内
山背近江丹波播磨讚岐作池九月二日丙
申以太師押勝為都督四畿内三關近江丹
波播磨等國兵事使十一日乙巳押勝謀反
走據近江立道祖王兄冰上鹽燒稱帝敕從

五位下藤原藏下麻呂將兵討之是日以參

議吉備真備兼中衛大將是日以下據本書

文但有年無月日十三日丁未遣使奉幣大

今從公卿補任神宮十四日戊申以太宰員外帥藤原豐成

復為右大臣十八日壬子押勝鹽燒伏誅餘

黨悉平二十日甲寅太上天皇下詔以僧道

鏡為大臣禪師職分封戶一準大臣二十二


日丙辰太上天皇敕押勝所改官名悉復其

舊是秋石見疫多褻島飢賑贍之山陽南海

大日本史 卷之十一 綱目

二道旱疫冬十月二日己丑廢放鷹司置放生司九日壬申太上天皇遣兵部卿和氣王左兵衛督山村王外衛大將百濟敬福等率兵數百圍中宮院廢天皇為淡路公天皇惶遽不及衣履使者促之侍衛奔散從者僅兩三人步至圖書寮西北與所生當麻氏至小子門乘以驛馬使右兵衛督藤原藏下麻呂衛送配所幽之一院太上天皇重莅朝政明年二月敕淡路守佐伯助曰如聞配流罪人

稍致逃亡事如有實何不早奏汝往監察須報動靜又宜詔曰廷臣或有通心淡路謀復位者而彼為人昏愚不善不足使治天下黨于逆賊殆覆國家豈可使此人再臨四海宜杜絕姦謀遵守詔旨自是守衛益嚴十月二十一日庚辰天皇不勝憂憤踰垣而逃佐伯助等率兵邀之明日崩於院中○一代要記為九月崩誤年三十三年據本書立為太子年二十五寶龜三年八月光仁帝遣從五位下三方王等



於淡路、改葬、設齋度僧、永修功德、九年三月、
敕墓稱山陵、所生當麻氏墓、稱御墓、置守陵

一戶、○延喜式、水鏡、並曰、廢帝陵、在淡路三原郡。

大日本史卷之十九終

大日本史卷之十九

本紀第十九


權中納言從三位源光圀 修

男權中納言從三位綱條 校

玄孫權中納言從三位治保 重校

稱德天皇

稱德天皇、初傳位於廢帝、受尊號、既而廢帝
深惡僧道鏡、常以為言、天皇不憚、天平寶字
六年、自保良宮、還平城宮、天皇徙居法華寺。



召五位已上於朝堂、宣詔曰、岡宮天皇皇統
 將絕、朕以女子奉皇太后命、祇膺寶位、行政
 日久、立帝為嗣、而帝不恭不順、反成怨仇、誣
 朕所不言、以為言之、朕所不行、亦為行之、朕
 之致此、實由薄劣、深自愧赧、當發菩提心、良
 緣在此、故出家為佛弟子、但朝廷小事、今帝
 行之、國家大事、賞罰二柄、朕親決之、○一代
 要記、歷
代皇紀、元亨釋書、八年十月九日壬申、遣山
 竝曰、法名法基、
 村王宣詔曰、頃歲帝德有闕、不堪負荷大業、

且聞與藤原仲麻呂同心、將圖朕躬、竊謀發
 兵六千、入關作亂、故廢為親王、賜爵淡路公、
 流船親王於隱岐、池田親王於土左、自是天
 皇重臨萬機、天皇以下、據本書明年十一月
 之文、○愚管鈔、一代要記、帝王
編年記、竝曰、明年正月、
 朔、即位、不知何據、
公卿補任 十一月甲戌、敕禁天下諸國養鷹狗及
 鶉、停御贄進肉魚、又停中男作物、用魚肉蒜
 等、悉以他物易之、但神戶不在此限、十四日
 丁丑、宣詔曰、百官所司、僉謂當立皇太子、以

定鴻基、朕非不念之、然衆之所推、不必克終、天所不與、雖得必喪、人不可得而授力、不能得而競、天之所授、自有其人、朕非叨貪大寶、不敢定嗣、天意所嚮、久而當彰、又敕曰、衆欲援立以成己功、竊議儲位、通心合謀、勸誘樹黨、事不能成、家門滅亡、子孫永絕、自今已後、宜忠貞明白、遵教奉承、十六日己卯、敕曰、朕忝臨萬邦、軫慮一物、昧且思治、夕惕兢兢、而賊臣仲麻呂昏凶狂悖、作逆逋亡、天網高張、

咸伏誅戮、朕念黎庶、洗滌舊惡、遷善自新、宜大赦天下、但仲麻呂黨與及常赦所不免者、不在赦限、又頃年水旱、不得豐稔、民或飢乏、軍役仍興、宜免天下今年租、二十一日甲申、敕赦京師見禁囚徒、大辟以下、但逆賊仲麻呂及淡路公、船王、池田王黨與、不在赦限、癸巳、晦、敕停定額及額外散位等、輸續勞錢、令東海、東山諸國貢騎女、十一月十二日乙巳、罷西海道節度使、二十日癸丑、遣使奉幣近

江名神、賽討賊之禱、十二月二十八日庚寅、
敕曰、朕以寡德、君臨萬民、善化未宣、刑辟猶
衆、宜大赦天下、常赦所不原者、不在赦限、若
入死者、皆減一等、是月、西方有聲如雷、大隅
薩摩之界、烟雲晦冥、七日不晴、海濱沙石聚
成三島、埋沒民屋、是歲、兵旱相仍、米石千錢、
天平神護元年乙巳、春正月癸巳朔、御西宮
前殿受朝、七日己亥、詔曰、朕以眇身、忝承寶
祚、德化無聞、姦回屢見、疫癘荐臻、頻年不稔、
傷物失所、如納深隍、賊臣仲麻呂、外戚近臣、
先朝所用、得堪委寄、更不猜疑、何期包藏禍
害、蠱毒流行天下、犯怒人神、怨氣感動上玄、
幸賴神靈護國、風雨助軍、不盈旬日、咸伏誅
戮、今元惡已除、同歸遷善、洗滌舊穢、與物更
新、宜改天平寶字九年為天平神護元年、○

代要記、為十日、改元、誤、又宣詔曰、夫褒賞羣臣、各有其
分、或以平日勤勞、或以軍旅功績、而今進位
授官、宜異常制、當治平之日、誰不奉其職、嚮

者國家有事羣臣竭力不惜軀命執心貞淨護衛朝廷宜錄其功以甄推獎自今而後黽勉靡懈教導庸劣益存勤恪於是進羣臣位宴五位以上賜物有差八日庚子敕復官軍所經近江高島郡調庸二年滋賀淺井二郡一年竝以沒官物量加賑恤二月三日甲子改授刀衛爲近衛府始置內廐寮八日己巳以從三位藤原藏下麻呂爲近衛大將二十九日庚寅糶左右京粟於東西市斗百錢是

月京師米貴令西海道諸國運私米三月二日癸巳敕比年遭旱百穀不登朕甚愍之其去年不熟之國今年得稔須微納之若有今年亦不熟者至於秋時待敕處分其備前備中備後三國多年亢旱荒弊尤深因茲所負正稅不得進納天平寶字八年以前官稻未納咸悉免之四日乙未以參河下總常陸上野下野旱詔免今年調庸十之七八五日丙申敕禁天下人民恣爲墾田又禁王臣私貯

兵器其所有者皆令輸官夏四月十六日丁
丑糶左右京穀一千石於東西市五月二十
六日丙辰糶穀一千石於貧民六月十日庚
午糶穀一千石鹽一百石於貧民秋七月十
四日甲辰糶左右京穀三千三百石於諸司
官人八月庚申朔參議兵部卿和氣王謀反
伏誅參議式部大輔粟田道麻呂兵部大輔
大津大浦式部員外少輔石川永年坐其黨
遠竄九月八日丁酉更鑄新錢與舊錢並行

二十一日庚戌以將行幸紀伊遣使造行宮
于大和河內和泉冬十月己未朔日有食之
十三日辛未行幸紀伊十八日丙子至玉津
島十九日丁丑御南濱望海樓奏雅樂雜伎
權置市廩使從官及當國百姓爲交關二十
三日辛巳淡路公薨二十六日甲申車駕還
至和泉深日行宮戊子晦至河內弓削寺禮
佛奏樂閏月二日庚寅以大臣禪師道鏡爲
太政大臣禪師詔使文武百官拜賀之是日

復幸弓削寺三日辛卯詔免河内和泉今年
 調及河内大縣若江二郡和泉三郡田租行
 宮側近高年賜物赦死罪以下是日車駕還
 因幡宮十一月五日壬戌遣使修造天下神
 社十六日癸酉大嘗二十七日甲申右大臣
 藤原豐成薨是歲左右京和泉山背伊賀尾
 張參河駿河甲斐相模常陸美濃武藏上野
 下野能登越中丹波伯耆出雲石見隱岐播
 磨美作備後紀伊淡路阿波讚岐伊豫壹岐

多嶽島飢咸賑贍之又造西大寺鑄金銅四

天王像又造以下水鏡帝王編年記元亨釋

二年丙午春正月八日甲子以太納言藤原

永手為右大臣十四日庚午禁兩京畿内里

中蹈歌十四日以下夏四月二十三日丁未

敕比日之間緣有所念歸依三寶行道懺悔

泣罪解網先聖仁迹冀施恩恕盡洗瑕穢宜

失赦天下但先後逆黨不在赦限甲寅晦有

一男子自稱聖武皇帝皇子石上志斐氏所

生、勘問無實、詔配遠流、五月十七日辛未、奉幣帛於丹生川上、及畿內羣神祈雨、六月三日丁亥、日向大隅薩摩大風、桑麻盡損、詔免柵戶調庸、五日己丑、大隅神造新島震動、不息、民多流亡、賑恤之、二十六日庚戌、以左右京及大和、頻年不登、敕免負租、○一代要記曰、是月大雪、然本書不載、故不書、秋七月二十三日丙子、遣使造丈六佛像於伊勢大神寺、九月五日戊午、敕曰、此見伊勢美濃等國奏、大風損官舍數多、有

人殞命者、昔不問馬、先達深仁、今以傷人、朕甚悽歎、如聞國司等、朝委未稱、私利早著、倉庫懸磬、稻穀爛紅、已忘暫勞永逸之心、遂致雀鼠風雨之患、良宰莅職、豈如此乎、自今以後、永革斯弊、宜令諸國具錄歲中修理官舍之數、付朝集使、每年奏問、國分二寺、亦宜准此、不得假事神異、驚人耳目、十五日戊辰、敕、麥者繼絕救乏、穀之尤良、宜令天下諸國、勸課百姓、種大小麥、十五日以下、類聚三代格、二十三日丙

子遣巡察使於五畿六道訪民疾苦西海道
 令太宰府勘檢冬十月癸未朔日有食之二
 十日壬寅置隅寺毗沙門像所現舍利於法
 華寺詔百官主典以上禮拜授太政大臣禪
 師道鏡法王位○按水鏡係神護景雲二年而法王作法皇誤授大
 僧都圓興法臣位僧基真法參議大律師又
 詔以右大臣藤原永手為左大臣大納言吉
 備真備為右大臣二十一日癸卯敕嚮有所
 思發菩提心歸無上道因有靈示舍利三粒

見於緘器數月感嘆莫識所由朕聞麟鳳五
 靈王者嘉瑞至德之世史不絕書未見全身
 舍利如是顯形有感必通良有以也朕以虛
 薄兢懼歷年撫育乖方冰谷在惕豈思至道
 凝寂應微情而示真圓性湛然結靈光而表
 質孤園絕跡久矣驚心雙林晚容爛然滿日
 玄珪綠字何以同年西法東流知在茲日猥
 荷希世之靈寶盍同衆庶之歡心宜文武百
 官六位已下加位一級十一月七日己未以

陸奧磐城宮城二郡穀十萬六千四百餘斛
賑給貧民、十二月十二日癸巳、行幸西大寺、
二十八日己酉、震夫安寺東塔、是歲、河內和
泉志摩石見淡路多禰島飢、賑給之、
神護景雲元年丁未、春正月八日己未、敕畿
內七道、修吉祥悔過於國、分金光明寺七日、
以祈風雨順時、五穀成熟、十八日己巳、詔賜
諸王年老有功勞者爵、二月四日甲申、行幸
東大寺、七日丁亥、車駕臨大學釋奠、八日戊

子、行幸山階寺、三月庚戌朔、日有食之、二日
辛亥、行幸元興寺、三日壬子、行幸西大寺法
院、九日戊午、行幸大安寺、十四日癸亥、行幸
藥師寺、夏四月十四日癸巳、東院新殿成、葺
以瑠璃瓦、畫以藻績、時人謂之玉宮、二十四
日癸卯、敕曰、農者天下之本也、吏者民之父
母也、勸課農桑、令有常制、比來諸國、頻年不
登、匪啻天時有愆、抑亦人事怠慢、宜擇國司
郡司恪勤者、及民間良謹篤誠者、禱祀神祇、

勸課農業、其所祈有應、所勸有功、則殊加褒賞、二十六日乙巳、行幸飽浪宮、二十八日丁未、還宮、五月四日壬子、貸種子於畿內、秋七月十日丁巳、始置內豎省、八月八日乙酉、參河言慶雲見、召六百僧於西宮寢殿設齋、十六日癸巳、詔改元、赦天下、羣臣進位賜物、表旌孝子順孫、義夫節婦、賑恤高年鰥寡孤獨、免天下今年田租之半、九月戊申朔、日上有雲五色、二日己酉、行幸西大寺島院、冬十月

二十四日庚子、御大極殿、召六百僧、轉讀大般若經、奏樂及蹋歌、是月陸奧伊治城成、是歲山背志摩尾張饑、和泉五穀不登、淡路旱饑、賑給之、美濃比年亢旱、不稔、免逋租、二年戊申、春正月十日乙卯、播磨獻白鹿、二月二十八日癸卯、筑前怡土城成、三月乙巳朔、日有食之、十日甲寅、免左右京五畿內天平神護二年逋租、十四日戊午、雨雹、夏五月三日丙午、敕曰、入國問諱、於禮有之、頃見諸

大日本史 卷十九
十一
司入奏名籍、或不避國主國繼之名、或取真人朝臣爲字、又用佛菩薩及聖賢之號、每經聞見、不安于懷、其如此之類、宜卽改換、務從禮典、二十三日丙寅、以早奉幣畿內羣神、六月二十一日癸巳、武藏獻白雉、敕曰、朕以虛薄、謬奉洪基、君臨四方、子育萬類、善政未洽、每兢情於負重、淳風或虧、常駭念於馭奔、方今武藏人飛鳥部吉志、五百國獲白雉於久良郡、以獻、下羣卿議之、奏曰、雉者良臣之心

忠貞之應、白乃聖朝重光照臨之符、國號武藏、旣呈戢武崇文之祥、郡稱久良、是明寶曆延長之表、姓是吉志、則標兆民子來之心、名五百國、固彰五百朝貢之驗、朕對越嘉貺、還愧寡德、昔者隆周刑措、越裳乃致、豐碕升平、長門亦獻、永言休徵、固可施惠、宜除武藏天平神護二年已往逋租、免久良郡今年田租三分之一、國司郡司叙位一級、五百國授位賜物、秋七月十一日壬午、日向獻白龜、十九

日庚寅、太宰府言、肥後八代郡正倉院北、蝦
蟇陣列廣可七丈、向南而去、辛丑晦、敕崇孔
子、用文宣王謚、八月壬寅朔、日有食之、八日
己酉、參河獻白鳥、十九日庚申、下總上言、䟽
毛野川、許之、九月十一日辛巳、詔曰、頃者參
河獻白鳥、日向獻白龜、赤眼、青馬、白鬣、尾、皆
付所司、令勘圖牒、並合大瑞、朕以菲薄、頻荷
鴻貺、思順先典、式覃惠澤、宜免肥後、日向、今
年之庸、出瑞郡、特免調庸、獲者授位、賜物、冬

十月二十日庚申、行幸長谷寺、二十三日壬
戌、還宮、十一月二日壬申、美作獻白鼠、十
月四日甲辰、法參議基真有罪、竄于飛驒、是
歲、壹岐島饑、賑給之、三年己酉、春正月庚午朔、以雨廢朝、二日辛
未、御大極殿受朝、三日壬申、法王道鏡居西
宮前殿、大臣已下拜賀、七日丙子、天皇御法
王宮、宴五位已上、八日丁丑、御東內、始行吉
祥、悔過、十七日丙戌、御東院、賜宴羣臣、二月

三日壬寅、行幸左大臣藤原永手第、十六日
乙卯、奉神服於大神宮、及天下諸社、二十四
日癸亥、行幸右大臣吉備真備第、三月二十
八日丙申、大赦天下、夏四月二十四日辛酉、
行幸西大寺、五月十六日癸未、伊勢獻白鳩、
二十五日壬辰、不破內親王坐巫蠱、放於京
外、流氷上志計志麻呂於土左、秋七月十五
日庚辰、奉幣畿內風伯、八月丙申朔、日有食
之、九日甲辰、尾張大水、賑穀貧民、二十五日

己丑、從五位下和氣清麻呂以忤道鏡、流於
大隅、冬十月己未朔、宣詔賜羣臣紫綾帶、兩
端以金泥書恕字、十五日己酉、行幸飽浪宮、
十七日辛亥、遂幸由義宮、二十一日乙卯、權
建肆鄺於龍華寺、車駕臨觀焉、甲子晦、詔以
由義宮爲西京、河內國爲河內職、曲赦死罪
以下、十一月九日癸酉、車駕還宮、二十七日
辛卯、伊豫獻白鹿、是歲、志摩下總饑、賑給之、
四年庚戌、春正月十五日戊寅、設仁王會於

宮中、二十一日甲申、太宰管内大風壞廬舍、賑恤之、二月二十七日庚申、行幸由義宮、三月四日下卯、饗新羅使於太宰府而還之、二十日辛卯、觀歌垣、夏四月五日丁酉、詔造由義寺塔、六日戊戌、車駕還宮、二十六日戊午、先是、藤原仲麻呂之亂、天皇發願、造三層小塔一百萬、至是塔成、分置諸寺、五月十一日壬申、敕曰、去歲伊豫獻白鹿、今年太宰府進白雀、乾坤降祉、符瑞駢臻、或瑞羽呈祥、或

珠毛表貺、良由宗社積德、餘慶所覃、豈朕庸虛、敢當茲應、奉天休而倍惕、荷靈貺以逾兢、唯可與同德、公卿佐治、良吏弘政、至道教答、上玄宜准前脩、量施惠政、獲瑞者授位、賜物、免伊豫肥後神護慶雲三年以往正稅未納、又出瑞郡田租三分之一、六月壬辰朔、敕大赦天下、十日辛丑、先是、天皇至自由義宮、不豫、歷月、於是敕左大臣藤原永手、攝知近衛外衛、左右兵衛事、右大臣吉備真備、知中衛

左右衛士事二十三日甲寅祭疫神于京師
四隅畿内十界是月彗星入北斗至七月乃
滅是夏京師飢疫志摩大風美濃霖雨對馬
島饑賑贍之秋七月十五日乙亥敕曰朕荷
負重任履薄臨深上不能先天奉時下不能
養民如子撤膳菲躬日慎一日禁殺之令設
國宥罪之典班朝而猶疫氣損生變異驚物
永言疚懷不知所措唯有佛教脫苦除災故
仰彼覺風拂斯稜霧令京師大小寺限六七

日轉讀大般若經普告天下斷葷酒肉各國
諸寺同讀此經内外文武官屬亦同此制十
八日戊寅常陸獻白鳥筑前獻白雉是月出
羽雨水但馬疫土左饑賑恤之八月庚寅朔
日有食之遣參議外衛大將藤原繼繩於伊
勢奉幣帛及馬於大神宮又遣使奉馬於若
狹彥神八幡神宮二日辛卯遣使奉幣帛於
越前氣比神能登氣多神遣雅樂頭伊力至
於住吉受神教四日癸巳天皇崩于西宮寢

殿年五十三

○愚管鈔神皇正統記為五十七誤

左大臣藤原

永手等相議立大納言白壁王為皇太子葬

于添下郡佐貴鄉高野山陵稱高野天皇是

春巫覡等言西大寺東塔礎石作妖因積柴

灌酒燒碎棄于道路適天皇不豫卜之曰石

作祟乃移之淨地以厭禳焉其後天皇幸由

義宮覺聖躬不豫即還平城宮經百餘日不

親視事羣臣不得謁見典藏吉備由利出入

卧内傳可奏事天皇尤崇佛道務恤刑獄勝

寶之際政稱儉約自仲麻呂誅道鏡檀權輕

興力役務繕伽藍公私彫喪國用不足政刑

日峻殺戮妄加比初政頗多寬濫云後世稱

前朝曰孝謙天皇后朝曰稱德天皇

大日本史卷之十九終

大日本史卷之十九
光仁天皇
光仁天皇諱白壁天智帝之孫春日宮天皇
施基第六子也
銅二年十月十三日乙未生焉

大日本史卷之二十

本紀第二十一

權中納言從三位源光圀

男權中納言從三位綱條

玄孫權中納言從三位治保重校

光仁天皇

光仁天皇諱白壁天智帝之孫春日宮天皇

施基第六子也

銅二年十月十三日乙未生焉

大日本史

卷之十九

本紀

一

天平九年九月、敘從四位下、天平寶字三年
六月、敘從三位、六年十二月、任中納言、八年
九月、敘正三位、天平神護元年正月、授勳二
等、二年正月、爲大納言、天皇寬仁敦厚、意豁
如也、天平勝寶己來、國家無儲貳、人疑彼此、
罪廢者多、天皇深慮橫禍、縱酒自晦、故數免
害、神護景雲四年八月四日癸己、稱德帝崩、
從四位上藤原百川、與左大臣藤原永手、右
大臣吉備真備、參議藤原宿奈麻呂、藤原繩

麻呂、石上宅嗣、近衛大將藤原藏下麻呂等、

定策禁中、卽日以遺詔奉天皇爲皇太子、

本

不載百川、今從六月乙未、令天下舉哀、服限

公卿補任、水鏡、

二年、差近江兵二百騎、守衛宮闕、十七日丙

午、葬稱德天皇、僧道鏡奉梓宮、留廬陵下、二

十一日庚戌、下令、貶道鏡爲造、下野藥師寺

別當、二十二日辛亥、流大納言弓削淨人、其

子廣方等於土左、二十六日乙卯、以河內職

復爲河內國、九月三日壬戌、沙汰令外官冗

員六日乙丑召還流人和氣清麻呂、二十三日辛巳天下大赦、二十三日壬午停一年服期、天下從吉、十月己丑朔皇太子即天皇位、于大極殿、時年六十三、年據水鏡歷代皇紀、皇代記及本書崩年七十三、先是肥後連獻白龜、宣詔改神獲景雲四年為寶龜元年、大赦天下、賑贍高年貧窮及孝義者、免天下今年田租、左大臣藤原永手、右大臣兼中衛大將吉備真備並如故、左大臣以下、公卿補任

寶龜元年庚戌冬十月八日丙申吉備真備

罷中衛大將十一月六日甲子追尊皇考曰

春日宮天皇、○帝王編年記、皇兄弟姊妹諸

皇子悉為親王、立妃井上内親王為皇后、十

日戊辰行幸甕原、二十七日己酉敕宥先後

逆黨、三月六日丙午

二年辛亥春正月十三日辛未停天下吉祥

悔過、二十三日辛巳立皇子他戶親王為皇

太子、以大納言大中臣清麻呂為傅、大赦天

大日本史 卷二十一 本記 三

下二月十三日庚子、行幸交野、十四日辛丑、
遂幸難波宮、二十一日戊申、車駕還至竹原、
井行宮、節幡竿無故自折、二十二日己酉、左
大臣藤原永手薨、三月戊午朔、太宰府獻白
雉、五日壬戌、使天下諸國祭疫神、十三日庚
午、以大納言大中臣清麻呂爲右大臣、正三
位藤原良繼爲內臣、是月右大臣吉備真備
致仕、致仕據本書六年十月
真備薨條及公卿補任、閏月十八日乙
己、壹岐島獻白雉、夏五月二十二日己酉、右

京人獻蠶成字、二十七日甲寅、始設春日宮

御宇、天皇忌齋於川原寺、著爲國忌、

國忌據
三代實

錄元慶
八年

六月十六日乙丑、以旱奉馬於丹生

川上神、秋九月二十二日乙巳、罷左右平準

署、冬十一月十八日庚子、遣使造齋宮於伊

勢、二十一日癸卯、大嘗、二十九日辛亥、有星

隕于西南、聲如雷、十二月癸丑朔、日有食之、

十五日丁卯、追尊所生紀氏爲皇太后、墓稱

山陵、置國忌、是歲石見飢、賑給之、

三年壬子春正月三日甲申渤海遣使來貢
以表文無禮卻之二月十七日戊辰行幸右
大臣大中臣清麻呂第二十四日乙亥以旱
奉馬於丹生川上神丁卯○今推干支丁卯
十六日而本書敘
乙亥下卯疑丑之訛
丁丑二十六日也罷內豎署及外衛府三
月二日癸未皇后井上內親王坐巫蠱廢十
五日丙申始免出羽國司戶徭夏四月十八
日戊辰赦天下二十九日己卯震西大寺西
塔五月二十六日丙午西北空中有聲如雷

二十七日丁未廢皇太子六月庚戌朔日有
食之四日癸丑參河獻白鳥十五日甲子設
仁王會於宮中及京師諸寺天下國分金光
明寺十六日乙丑有虹繞日十九日戊辰隕
石於京師數日大如柚子二十三日壬申以
旱奉幣帛於畿內諸神秋七月二十二日辛
丑上總獻馬前蹄似牛以其係詐偽罰國司
介等本主決杖八十八月六日甲寅行幸難
波內親王第是日大風雨拔樹發屋卜之伊

勢月讀神爲祟、每年九月奉馬、准荒祭神、十
八日丙寅、遣使淡路、改葬廢帝、是月霖雨大
風、河內堤決、二十二、九月三日庚辰、山背獻
木連理、二十六日癸卯、遣使六道覆損、冬十
月十日丁巳、太宰府言、去年五月、豐後速見
郡、山崩澗壅、民屋漂沒、詔免調庸、賑給之、十
一日戊午、肥後葦北郡、八代郡、各獻白龜、十
四日辛酉、除墾田禁、十一月十日丙戌、詔以
風雨不調、頻年飢荒、復天下國分寺吉祥悔

過、十一日丁亥、詔免京畿七道遭風者田租、
十三日己丑、以酒人內親王爲伊勢齋、十二
月十三日己未、星隕如雨、二十三日己巳、彗
星見南方、召百僧、設齋楊梅宮、二十五日辛
未、行幸山背水雄岡、二十九日乙亥、有馬嚙
的門土牛偶人、是歲尾張飢、讚岐疫、賑給之、
四年癸丑、春正月二日戊寅、立皇子中務卿
山部親王爲皇太子、大赦天下、○本書正月
二月平支錯月
次、今推甲子訂之、按水鏡、歷代皇紀、十四日
立皇太子、十四日庚寅也、未知孰是、今姑從

書七日癸未○本書作辛未、今推之、是月無

前文及御重閣中院設宴賜物其為詔曰朕

七日明矣蓋癸訛作辛故今訂之以寡薄忝承洪基風化未洽恒深納隍之懷

災異屢臻彌軫臨淵之念今者初陽啓曆和

風扇物天地施仁動植仰澤思順時令式覃

寬宥宜大赦天下二月十七日壬戌地動二

十七日壬申揚梅宮成徙御焉乙亥晦地震

三月十三日戊子以旱奉馬丹生川上神十

四日己丑以天下穀貴廷議定常平法遣使

七道糶穀賑民其賤糶私稻者授位夏四月

十八日壬戌敕曰朕君臨四海子育兆民崇

德忘食恤刑廢寢而德化未洽災異屢臻興

言念此自顧多慙設法雖期無刑觀辜猶有

垂泣宜因生長之時式弘寬宥之澤可大赦

天下寶字元年八年逆黨遠近配流咸赦之

令得自便但高元度及強竊盜不在赦限

二十日丁卯奉馬丹生川上神五月乙亥

朔以旱奉幣畿內諸神二日丙子雨二十七日

日辛丑、隕星于南北各一、大如瓮、六月乙巳朔、日有食之、二日丙午、霖雨、十四日戊午、渤海使至、能登、遣使責其無禮、卻之、秋七月十日癸未、祭疫神於天下諸國、八月八日辛亥、霖雨、二十七日庚午、先是下野上野正倉災、至是敕諸國郡司燒官物者、解其見任、壬申晦、地動、九月十五日丁亥、常陸獻白鳥、冬十月癸卯朔、地震、四日丙午、又震、十二月二十五日乙未、敕增益福田、憑釋教之弘濟、光隆

國祚資大悲之神功、是以比日依藥師經、請僧設齋、至于放生、理所宜急、加以陽氣始動、仁風將扇、順此時令、恩施霈澤、可大赦天下、是日、備前言、未連理、是歲、以大納言藤原魚名兼近衛大將、○本書不書魚名為大將、九年三月魚名為內臣條、書近衛大將如故、公卿補任係是年、今據之、左右京志摩尾張饑、參河近江飛驒出羽大風、並賑贍之、伊賀疫、給醫藥、

五年甲寅、春正月二十日庚申、詔停蝦夷俘

因入朝、二十五日乙丑、山背言、去年十二月、
乙訓社狼鹿野狐每夜聚鳴一百許、七日而
止、二月三日壬申、以禳疫讀經於天下諸國、
七月三日癸卯、新羅使來、責其無禮、却
之、十八日丁巳、敕罷員外國司、夏四月十一
日己卯、敕以疾疫流行、使文武百官天下百
姓念誦摩訶般若波羅密、二十二日庚寅、以
旱奉馬丹生川上神、六月五日壬申、以豺狼
怪、奉幣乙訓社、是日、又奉馬丹生川上神、秋

七月十日丁未、上總獻白鳥、二十三日庚申、
敕陸奧鎮守將軍大伴駿河麻呂討蝦夷、八
月二日己巳、敕坂東八國、陸奧如有告急、速
發兵赴援、二十二日己丑、行幸新城宮、九月
六日壬寅、修諸國溝池、七日癸卯、遣使天下
覆損、二十五日辛酉、遣使五畿內、修造陂池、
冬十月四日庚午、大伴駿河麻呂等討平蝦
夷、遣使陸奧宣慰之、十一月九日甲辰、行幸
坂合部內親王第、十二月、始設方廣、悔過於

宮中

源、十二月以下、年中行事、公事根、始于此、是歲京

師及大和河内志摩尾張參河近江美濃飛
驒若狹能登伊豫土左讚岐飢咸賑給之
六年乙卯春正月三日丁酉敕三春初啓萬
物惟新天地行仁動植霑惠古之明主應此
良辰必布恩德廣施慈令朕雖虛薄何不思
齊宜大赦天下二月八日辛未地震十三日
丙子遣使伊勢修渡會郡堰溝三月二十二
日丙辰以去年蝦夷騷動田疇荒廢詔復陸

奧今年課役田租二十五日己未置酒田村
故宮羣臣上壽賜物有差夏四月七日己巳
河内攝津有鼠食五穀草木遣使奉幣諸國
神社十三日乙亥近江獻白龜十五日丙
山背獻白雉二十七日己丑廢后井上内親
王庶人他戸並卒五月四日丙申地震十四
日丙午白虹竟天六月十九日辛己以正四
位下佐伯今毛人爲遣唐大使正五位上大
伴益立從五位下藤原鷹取爲副二十三日

甲申遣使祭疫神於畿内諸國二十五日丁亥以旱奉馬丹生川上神奉幣畿内諸國神社能興雲致雨者秋七月十六日丁未下野言都賀郡有黑鼠數百食草木根數十里十九日庚戌雨雹八月十二日癸酉始設蓮葉宴十九日庚辰先是敕京官祿薄不免飢寒之苦國司利厚自有衣食之饒因茲庶僚咸望外任多士曾無廉恥朕君臨區寓志在平分思欲割諸國之公廨加在京之俸祿至是

太政官奏每國割公廨四分之一以益在京

俸祿奏可二十二日癸未伊勢尾張美濃言

大風雨壞民廬舍人畜多死○本書曰三國

風雨云云九月日三字疑有謬遣使修理齋

宮按檢遭災百姓是日祭疫神於五畿内辛

卯晦以大風雨故大祓九月十六日丙午河

内獻白龜二十一日辛亥以霖雨奉白馬及

幣於丹生川上神畿内諸神冬十月辛酉朔

日有食之二日壬戌前右大臣吉備真備薨

六日丙寅地震十三日癸酉天皇生日先是
敕名此日爲天長節使諸寺僧尼每年是日
轉經行道海內禁屠至是大酺賜物羣臣有
差出羽言蝦夷未平請置鎮兵敕差發相模
武藏上野下野兵士十九日己卯召二百僧
讀大般若經於宮中及朝堂二十四日甲申
以風雨地震大後二十五日乙酉奉幣帛於
大神宮十一月六日丙申遣使五畿肉修溝
池七日丁酉太宰府言日向薩摩風雨損桑

麻詔免今年調庸是歲和泉參河信濃丹後
備前讚岐饑賑恤之

七年丙辰春正月十九日戊申遣檢稅使於
七道二月六日甲子有流星大如盆夏四月
戊午朔日有食之十二日己巳敕祭祀神祇
國之大典若不誠敬何以致福如聞諸社不
檢損穢春秋之祀亦多怠慢因茲嘉祥弗降
災異荐臻宜諭諸國莫令更然五月二日戊
子出羽志波村蝦夷叛發下總下野常陸等

騎兵討之、二十九日乙卯、以災異屢見大祓、
丙辰晦、召僧六百、讀大般若經於宮中及朝
堂、六月四日庚申、太白晝見、十八日甲戌、以
旱大祓于京畿諸國、奉馬丹生川上神、秋七
月十九日甲辰、震西大寺西塔、八月丙辰朔、
遣使奉幣天下神社、其社祝不勤洒掃、以致
蕪穢者、罷之、十三日戊辰、大風、是月、天下蝗、
畿内遣使巡視、諸國委國司檢之、閏月二十
八日壬子、丹後女子一產三男、賜稻乳母、壹

岐島風損稼、免今年調、九月十三日丁卯、配
陸奥俘囚於筑紫、二十日甲戌、天皇御大藏
省、賜陪從五位已上物、稱力取之、是月、每夜
有瓦石落内豎曹司京師屋上、經二十餘日
乃止、冬十月九日癸巳、地震、十一日乙未、以
陸奥頻經征戰、百姓凋弊、免今年田租、十一
月二日丙辰、地震、二十六日庚辰、發陸奥兵
伐膽澤賊、癸未晦、配出羽俘囚於筑紫及讚
岐、十二月十四日丁酉、罷遣唐副使大伴益

立以左中辨小野石根備中守大神末足代之陸奧百姓戊與郡者給復三年

八年丁巳春正月三日丙辰以内臣藤原良

繼為内大臣二月二十八日庚戌遣使五畿

内祭疫神壬子晦日有食之三月癸丑朔置

酒于田村故宫十六日戊辰行幸大納言藤

原魚名曹司十九日辛未以宮中頻有妖大

袂二十一日癸酉召六百僧於宮中讀大般

若經夏四月五日丙戌雨雹十三日甲午雨

水震太政官廳二十二日癸卯渤海遣使來

貢賀登極先是遣唐大使佐伯今毛入病不

能行敕副使小野石根持節行大使事五月

七日丁巳御重閣門觀射騎○按孝謙帝以聖武帝忌月廢

端午節至是又置故書廢置而此後不書說

見文武紀大寶元年但未知有何故而延至

於五日類聚國史收之十三日癸亥以霖奉馬

丹生川上神六月十八日戊戌揚梅宮南池

生雙頭蓮秋八月八日丙戌以霖奉馬丹生

川上神十一日己丑以從三位藤原曹子為

夫人九月十五日癸亥以發軍討賊復陸奧
今年調庸田租十八日丙寅內大臣藤原良
繼薨冬十月戊申晦大赦天下十一月十八
日丙寅長門獻白雉十二月二十五日壬寅
皇太子疾遣使奉幣五畿內諸社是冬不雨
井泉皆涸是歲伯耆隱岐讚岐飢賑給之
九年戊午春正月戊申朔以皇太子疾廢朝
二十日丁卯改葬井上內親王二月二十三
日庚子以參議藤原百川兼中衛大將三月

三日己酉以大納言藤原魚名爲內臣土左
言去年七月大風雨壞廬舍人畜流亡詔賑
給之二十日丙寅誦經東大西大法隆三寺
二十三日己巳敕廢帝墓稱山陵置守戶三
十四日庚午大赦天下度僧三十人二十七
日癸酉大赦遣使奉幣伊勢神宮及天下神
社以禱皇太子疾是日祭疫神於畿內丙子
晦以內臣藤原魚名改爲忠臣夏四月八日
甲申攝津獻白鼠十八日甲午行幸右大臣

大中臣清麻呂第、五月二十一日丁卯地震、
 二十五日辛未、又震、六月二十五日庚子、賜
 陸奧出羽國司已下有戰功者、二千二百六
 十七人爵、二十七日辛丑、特詔遣參議藤原
 是公、肥後守藤原是人、奉幣帛於廣瀨龍田、
 以祈風雨調和、秋稼豐稔、秋七月九日癸丑、
 飛驒言、慶雲見、八月甲戌朔、日有食之、冬十
 月二十五日丁酉、皇太子以疾瘳、詣伊勢、自
 拜神宮、賽宿禰、十二月十一日癸未、太宰府

獻白鼠、

十年己未、春正月壬寅朔、以忠臣藤原魚名
 為內大臣、五日丙午、渤海遣使來貢、三月十
 日辛亥、遣唐副使大神末足等至自唐、夏四
 月十九日己丑、夜暴風雨、折木發屋、五月三
 日癸卯、唐使孫興進等來、十七日丁巳、饗唐
 使於朝堂、授位賜物、六月二十三日辛酉、周
 防男子自稱他戶皇子、誑惑百姓、流之伊豆、
 秋七月戊辰朔、日有食之、九日丙子、參議兼

中衛大將藤原百川薨八月二日己亥因幡
言暴雨山崩水溢人畜漂流百姓飢餓遣使
賑恤十九日丙辰赦天下九月四日庚午以
中納言藤原繩麻呂兼中衛大將十四日庚
辰安置渤海鐵利人三百五十九口於出羽
冬十一月十九日乙酉太政官奏諸國正稅
多次員送納不給請停割諸國公廨加在京
俸祿可之十二月十三日己酉中納言兼中
衛大將藤原繩麻呂薨二十五日辛酉以中

務卿藤原田麻呂兼中衛權大將是歲駿河
大水飢饉賑給之
十一年庚申春正月丁卯朔以雨廢朝五日
辛未新羅遣使來貢十四日庚辰大雷京師
數寺災十九日乙酉詔曰令順四時聖人之
茂典網解三面哲后之深仁朕錫命上玄君
臨下土政先儉約志在憂勤雖道謝潛通功
慚日用而邇安遠至歲稔時雍今者三元初
曆萬物惟新宜順陽和播茲凱澤其赦天下

免今年田租。二月丙戌，詔曰：頃者彼蒼告譴，伽藍罹災，眷言于茲，情深悚悼。於朕不德，雖遇此尤，於彼桑門，寧亦無愧。如聞緇侶行，事與俗不別，上違慈教，下犯國憲。僧綱率而正之，其孰不正乎？二月二日丁酉，陸奧奏請造覺鑿城，以備蝦夷。許之。三月十六日辛巳，太政官奏：分官設職，不在繁多，宣風導民，務於簡要。是以制令之日，限置官員，量才授能，職務不滯。今官衆事殷，冗食者多，穀帛難生。

而用之不節，一歲不登，便有菜色。古者人稠田少，而有儲蓄，由節用也。今者地闢戶減，而患不足，由糜費也。臣等以爲當今之急，省官息役，上下同心，唯農是務，并省官員，則倉廩實而禮義行，國用足而廉恥興矣。又奏：方今諸國兵士，率多羸弱，徒免身庸，不歸天府。國司軍毅，自恣驅役，未習騎射，唯事芻蕘。以此赴戰，是謂棄之。請除三關邊要之外，隨國大小，以爲額點。殷富百姓，才堪弓馬者，專習武。

藝以應徵發其羸弱者皆令赴農此設守備
省浮費之道也並許之二十三日丁亥陸奧
言上治郡大領伊治咎麻呂反殺按察使紀
廣純蝦夷大亂二十九日癸巳以中納言藤
原繼繩爲征東大使正五位上大伴益立從
五位上紀古佐美爲副使甲午晦以從五位
下大伴真綱爲陸奧鎮守副將軍從五位上
安倍家麻呂爲出羽鎮狄將軍以討蝦夷夏
四月十八日壬子左京女子一產三男賜稻

乳母六月二十八日辛酉伊勢言鈴鹿關西
內城鼓自鳴秋七月十五日丁丑敕使緣海
諸國嚴爲警備二十二日甲申伊豫人越智
靜養女以私物資養窮民一百五十八人賜
爵二級九月二十三日甲申以正四位下藤
原小黑麻呂爲持節征東大使冬十月三日
癸巳左兵庫鼓自鳴十二月四日甲午敕左
右京今聞造寺悉壞墳墓採用其石非唯侵
驚鬼神實亦憂傷子孫自今以後宜加禁斷

十四日甲辰、又敕左右京無知百姓、招致巫覡、崇奉淫祀、芻狗符書、百方作怪、託事求福、頗涉厭魅、宜嚴禁之、是歲駿河伊豆飢疫、賑恤之、

天應元年辛酉、春正月辛酉朔、詔曰、以天爲大、則之者聖人、以民爲心、育之者仁后、朕以寡薄、忝承寶基、無益萬民、空歷一紀、惠澤壅而不流、憂懼交而彌積、日慎一日、念茲在茲、比有司奏、伊勢齋宮所見美雲、正合大瑞、彼

神宮者、國家所鎮、自天應之、吉無不利、其大赦天下、改元曰天應、天下老人賜粟、鰥寡孤獨不能自存者、量加賑恤、孝子順孫、義夫節婦、旌表門閭、終身勿事、又爲嵯麻呂等所誣、誤百姓歸順者、給復三年、諸國丁壯從役、陸奧出羽者、免今年田租、三月六日乙丑、地震、二十五日甲申、以不豫、詔大赦天下、二十六日乙酉、美作言、苦田郡兵庫鳴動如雷、伊勢言鈴鹿關西中城門鼓自鳴、是春下總飢、賑

之夏四月己丑朔、左右兵庫器械自鳴、遣使
伊勢美濃越前固關、三日辛卯、禪位於皇太
子、十二月二十三日丁未、天皇崩、年七十二、
明年正月、謚曰天宗高紹天皇、葬廣岡山陵、
又謚光仁天皇、○類聚國史、光或作廣、延曆五年十月、
改葬田原陵、○延喜式、陵上有東字、天皇龍潛之時、和
光接物、及正位南面、臨馭億兆、政舉大綱、不
在苛察、官省無用、化崇清簡、是以寶龜之間、
四海晏如、刑罪罕用、遐邇欣戴、可謂寬仁大
度、有君人之德矣、

大日本史卷之二十終

